



DECISIÓN DE NON SOMETER A AVALIACIÓN AMBIENTAL ESTRATÉXICA

Nome do plan: Plan especial de dotacións no Concello de Melón

Órgano promotor: Concello de Melón

Expediente: 2014AAE1742

Código web: 1670/2014

ANTECEDENTES

1. O Plan xeral de ordenación municipal (PXOM) do Concello de Melón aprobouse definitivamente mediante Orde do 01.08.2008 (DOG núm.168 do 01.09.2008). O Tribunal Supremo ratificou a sentenza do Tribunal Superior de Xustiza de Galicia pola que se anula a dita Orde de aprobación definitiva, de xeito que na actualidade o Concello de Melón está sen planeamento.
2. O día 13.10.2014 recibíuse na Consellería de Medio Ambiente, Territorio e Infraestruturas un escrito da alcaldesa do Concello de Melón no que comunica o inicio da tramitación do "Plan especial de dotacións no Concello de Melón" e achega un documento de inicio para que se determine se é preciso sometelo ao procedemento de avaliación ambiental estratéxica (AAE).
3. Con anterioridade, o 13.08.2014, este secretario xeral decidiu non someter ao procedemento de AAE o "Plan especial de dotacións no Concello de Melón" (expediente 2014AAE1723). Non entanto, o novo documento de inicio recibido incorpora modificacións (maior superficie do ámbito para poder crear zonas verdes e cumprir así os estándares urbanísticos da Lei 9/2002, do 30 de decembro, de ordenación urbanística e protección do medio rural de Galicia; distintas alternativas) que fan necesaria unha nova avaliación dos posibles efectos ambientais do plan.
4. Como paso previo a adoptar a decisión sobre o sometemento do Plan especial ao proceso de avaliación ambiental, o documento de inicio foi exposto ao público na páxina web desta Consellería por un prazo de vinte días naturais que finalizou o 03.11.2014. Ao mesmo tempo consultouse aos membros do Consello Galego de Medio Ambiente e Desenvolvemento Sostible e a outras administracións públicas.

CONSIDERACIÓNS LEGAIS

1. A Lei 2/2010, do 25 de marzo, de medidas urxentes de modificación da Lei 9/2002, do 30 de decembro (LOUG), integrou no procedemento de aprobación dos instrumentos de planeamento urbanístico o proceso de AAE previsto na Lei 9/2006, do 28 de abril, sobre avaliación dos efectos de determinados plans e programas no ambiente.
2. Os plans especiais deben ser obxecto de AAE cando así o decida o órgano ambiental en cada caso, agás que o planeamento xeral que desenvolvan fose sometido a avaliación ambiental (artigo 5.d da Lei 6/2007, do 11 de maio, de medidas urxentes en materia de ordenación do territorio e do litoral de Galicia). A decisión deberá ser motivada, pública e axustada aos criterios establecidos no anexo II da Lei 9/2006 do 28 de abril.
3. A Secretaría Xeral de Calidade e Avaliación Ambiental é o órgano competente para a tramitación dos procedementos en materia de avaliación dos efectos de determinados plans e programas no ambiente, segundo sinala o Decreto 44/2012, do 19 de xaneiro, polo que se establece a estrutura orgánica da Consellería de Medio Ambiente, Territorio e Infraestruturas.



CONSIDERACIÓNS TÉCNICAS

1. Características do plan

Ámbito de actuación: recinto de terreo no que se atopa o pavillón deportivo situado no lugar de Cruceiro Gordo, a carón da estrada nacional N-120 e a uns 2 km cara o norte do núcleo principal de Melón. O réxime que corresponde aplicar ao solo do ámbito é o do solo rústico, por tratarse dun concello sen planeamento (disposición adicional 2ª da LOUG). O recinto ten 5.082 m²



Obxecto: incorporar o pavillón de usos múltiples existente ao sistema de equipamentos deportivos de uso xeral.

Proposta: crear solo urbanizado con destino a equipamentos públicos. Identifícanse tres alternativas para localizar as zonas verdes e selecciónase a alternativa 3 que as sitúa cara o sur do pavillón.

2. Características ambientais da área probablemente afectada

O Concello de Melón atópase na zona centro-oeste da provincia de Ourense.

No ámbito que abrangue o plan especial xa existe unha edificación que é o pavillón polideportivo, ademais de varias instalacións ao aire libre entre o edificio e a estrada (unha pista polideportiva, unha pista de pádel, zona de xogos infantís e zona de ximnasia para maiores). O recinto conta con acceso directo á estrada N-120.

O pavillón está conectado á rede xeral de abastecemento, mentres que o sistema de saneamento é autónomo polo que no plan propónse instalar un sistema de depuración previa conexión ao pozo filtrante. Dispón de alumeado público e subministro de enerxía eléctrica.

O río Cerves, tributario do Miño, discorre polo sur do ámbito, quedando inserida na súa zona de policía a zona verde proposta no plan especial. No Plan hidrolóxico da demarcación hidrográfica do Miño-Sil este río está incluído no Rexistro de zonas protexidas como tramo de interese medioambiental (dende o seu nacemento ata o río Miño), xa que constitúe un espazo fluvial de elevado valor ecolóxico, paisaxístico e recreativo. Non obstante, no tramo de río próximo ao ámbito de actuación a canle natural xa está na actualidade alterada pola construción dunha presa.

O ámbito atópase fóra do espazo de interese natural "Ribeiras do Miño" delimitado nas Normas subsidiarias de planeamento da provincia de Ourense, aínda que próximo ao seu límite.



3. Período de exposición pública e consultas do documento de inicio

Durante o período de consultas recibíronse as seguintes observacións (os textos íntegros dos escritos remitíranse ao órgano promotor):

O Servizo de Planificación da Paisaxe, dependente do Instituto de Estudos do Territorio, reitera o manifestado no seu informe do 30.07.2014 respecto ao anterior documento inicial do plan especial. Así, considera que o plan non terá efectos significativos sobre a paisaxe pero recomenda acondicionar axeitadamente os accesos e a zona dianteira do pavillón, engadindo no seu caso arborado, co obxecto de mellorar a calidade da zona e a integración no conxunto.

O Servizo de Planificación e Programación Hidrolóxica, de Augas de Galicia, informa que se debería consultar á Confederación Hidrográfica do Miño-Sil nos aspectos relativos á xestión do dominio público hidráulico e da planificación hidrolóxica.

A Secretaría Xeral de Medio Rural e Montes, da Consellería do Medio Rural e do Mar, informa que na zona afectada polo plan especial non hai montes clasificados de utilidade pública, non hai montes protectores, non hai montes veciñais en man común, nin xestionados pola administración forestal, inclúe pequenas parcelas de monte poboadas de mato e arborado ralo de escasa relevancia forestal.

4. Efectos ambientais previsibles

Con este plan especial preténdese recoñecer a existencia dun pavillón de usos múltiples incorporándoo ao sistema de equipamentos deportivos de uso xeral.

De acordo cos criterios establecidos no anexo II da Lei 9/2006, do 28 de abril, conclúese que non se agardan efectos ambientais significativos. Non obstante, deberanse acondicionar axeitadamente os accesos e a zona dianteira do pavillón, así como as zonas verdes, co obxecto de mellorar a súa calidade e integración no conxunto.

Tendo en conta todo o indicado, ACORDO:

1. Non someter ao procedemento de avaliación ambiental estratéxica o *Plan especial de dotacións no Concello de Melón*.
2. Darlle publicidade a esta decisión no *Diario Oficial de Galicia* e na páxina web da Consellería de Medio Ambiente, Territorio e Infraestruturas (<http://www.cmati.xunta.es>).
3. Notificarlle esta decisión ao órgano promotor.

Santiago de Compostela, 4 de novembro de 2014

O secretario xeral de Calidade e Avaliación Ambiental



Justo de Benito Basanta